



**Broj/Број: 02 –50 –1-67-36/'04
Sarajevo/Сарајево: 29.12.2004.**

**ZAPISNIK
36. sjednice Doma naroda
Parlamentarne skupštine Bosne i Hercegovine,
održane 29. decembra 2004. godine**

Sjednica je počela u 15,30 sati.

Sjednicom je predsjedavao Goran Milojević, predsjedavajući Doma naroda Parlamentarne skupštine Bosne i Hercegovine.

Na sjednici je bilo 14 delegata.

Osim delegata, na sjednici Doma naroda bili su: predstavnici Vijeća ministara, predstavnici međunarodnih organizacija i predstavnici sredstava javnog informisanja.

Dom naroda usvojio je sljedeći dopunjeni

D N E V N I R E D

1. Odgovori na delegatska pitanja i delegatska pitanja
2. Prijedloga zakona o porezu na promet proizvoda i usluga – prvo čitanje
3. Prijedlog zakona o akcizama u Bosni Hercegovini – prvo čitanje
4. Davanje saglasnosti za ratifikaciju Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju
5. Davanje saglasnosti za ratifikaciju Sporazuma o kreditiranju i garanciji između Vlade BiH, kao garanta, Vlade Federacije BiH kao subgaranta, i JKP Vodovod i kanalizacije Tuzla, kao pozajmljivača i Mađarske Eksport-Import banke LTD.

Ad-1. Odgovori na delegatska pitanja i delegatska pitanja

Odgovora na delegatska pitanja nije bilo.

Delegat Tomislav Limov je postavio sljedeća pitanja Predsjedništvu BiH i Vijeću ministara:

1. Hoće li i koja će institucija Bosne i Hercegovine zvanično reagovati na neprimjerenu praksu pojedinih političara iz Republike Hrvatske i državne zajednice Srbije i Crne Gore koji dio svoje izborne kampanje vode na području Bosne i Hercegovine i koji javno dovode u pitanje ustavno-pravno ustrojstvo, teritorijalnu cjelovitost i integritet naše države?
2. Koje mogućnosti imaju tijela vlasti Bosne i Hercegovine u pogledu sprječavanja i sankcionisanja miješanja u unutrašnje stvari Bosne i Hercegovine od strane raznih Pašalića, Nikolića i njima sličnih?

Delegat Goran Milojević je postavio slijedeća pitanja Državnoj graničnoj službi, Agenciji za istrage i zaštitu BiH i Obavještajno – bezbjednosnoj agenciji:

U izvještaju koji je Vijeću sigurnosti UN podnijela glavna tužiteljica Haškog tribunala, navedeno je da 10 od 12 lica osumnjičenih za ratne zločine uglavnom boravi u Srbiji i Crnoj Gori, te da ista povremeno prelaze i preko granice na teritoriju BiH.

Kako su kao odlučujući razlozi za formiranje DGS, OSS-e i SIP-e na državnom nivou bile navedene potrebe efikasnijeg rada na izvršavanju obaveza prema Haškom tribunalu, ovim putem želim da postavim slijedeća pitanja:

Državnoj graničnoj službi BiH:

Budući da je DGS jedini ovlašten organ za kontrolu državne granice i pograničnog pojasa od 10 kilometara, smatra li se odgovornom za propuste koji se navode u izvještaju G-đe Del Ponte, i kako objašnjavaju činjenicu da ni tri godine nakon formiranja nisu preduzeli nijednu ozbiljniju akciju za sprječavanje ovih lica da prelaze državnu granicu, odnosno da li su pokrenuli ijednu inicijativu za njihovo privođenje?

Agenciji za istrage i zaštitu BiH (SIPA) i Obavještajno-bezbjednosnoj agenciji (OSSA):

S obzirom da je potreba efikasnog prikupljanja podataka kao osnovni preduslov za efikasno izvršavanje obaveza prema Hagu bila navođena kao osnovni razlog za njihovo formiranje, odnosno za prenos nadležnosti sa entiteta na institucije BiH, neophodno je da pruže odgovor zašto nisu preduzeli nijednu ozbiljnu akciju na realizaciji ovih zadataka. Isto tako, tražim da odgovore kako je moguće da su za cijelo ovo vrijeme od svog formiranja i početka rada dostavili samo jednu, i to neprovjerenu informaciju ove vrste MUP-u RS?

Da li se osjećaju odgovornim za neizvršavanje osnovnih zadataka i ciljeva radi kojih su i formirane, i da li smatraju da između njih i MUP-RS treba da postoje odnosi saradnje odnosno zakonom utvrđena obaveza dostave podataka MUP-u RS, kao i drugim organima nadležnim za realizaciju obaveza prema Hagu?

Ad-2. Prijedlog zakona o porezu na promet proizvoda i usluga – prvo čitanje

U raspravi su učestvovali: predstavnik Vijeća ministara, Jusuf Kumalić i Hasan Čengić.

Dom naroda jednoglasno je usvojio u oba čitanja Prijedlog zakona o porezu na promet proizvoda i usluga sa slijedećim amandmanima:

Amandman 1.

U članu 2. na kraju teksta dodati i značenje za slijedeće izraze:

«Uprava» je «Uprava za indirektno oporezivanje BiH»;

«Upravni odbor» je «Upravni odbor Uprave za indirektno oporezivanje BiH.»

Amandman 2.

U članu 7. stav (2), iza tačke 4. dodaje se tačka 5. koja glasi:

«5. tečni naftni plin (TNP) ukoliko se koristi kao reprodukcioni materijal».

Amandman 3.

Skraćenica «UIO» zamjenjuje se riječju «Uprava» u

članu 9. stav (1) tačka 7, članu 22. st. (1), (2) i (4), članu 23. stav (4), članu 26. stav (1) tačka a), članu 39. stav (1) tačka a), članu 49. stav (2) .

Amandman 4.

U članu 12. stav (1) tačka 1. mijenja se i glasi:

«1. proizvoda za ishranu ljudi uključujući prirodnu mineralnu i prirodnu izvorsku vodu, gaziranu i negaziranu vodu i prirodne sokove bez konzervansa, osim kafe i prerađevina od kafe;»

Amandman 5.

U članu 12. stav (1) tačka 11. riječi «Uprave za indirektno oporezivanje (u daljem tekstu: Upravni odbor);» brišu se.

U stavu (2) člana 12., iza riječi «tačke 12.» dodaju se riječi «stava (1)».

Amandman 6.

U stavu (2) člana 24., riječi «poreski obveznici javna preduzeća» zamjenjuju se riječima «javna preduzeća koja su poreski obveznici».

U stavu (3) člana 24. iza riječi «plaća se» dodaje se riječ «na».

Amandman 7.

U članu 32. tačka 4., riječi iza zareza «a ako poslovna jedinica nema status pravnog lica, prema sjedištu poslovne jedinice.», brišu se.

Amandman 8.

U stavu (2) člana 35., riječ na kraju rečenice «čuna» zamjenjuje se riječju «računa».

Amandman 9.

U članu 40. stav 4., iza riječi «kamate» dodaju se riječi «iz člana 28. ovog zakona», a ostali tekst ostaje isti.

Amandman 10.

U članu 49. stav (2), na kraju stava dodaje se «i to odlukom Upravnog Odbora u skladu sa članom 25. stav (2) Zakona o sistemu indirektnog oporezivanja u Bosni i Hercegovini («Službeni glasnik BiH» 44/03 i 52/04)».

Amandman 11.

U članu 49., iza stava (2), dodaju se stavovi (3) i (4) koji glase:

(3) U slučaju kada u skladu sa stavom (2) ovog člana Uprava preuzme nadležnost u pogledu poreza na promet domaćih akciznih proizvoda, u periodu dok Upravni Odbor ne usvoji potpune propise za primjenu ovog zakona, a u cilju postizanja osiguranja stabilnosti javnih prihoda i najpovoljnijeg tretmana poreskih obaveznika, Upravni odbor može, u situacijama koje nisu potpuno ili prikladno riješene privremenim propisima za primjenu ovog zakona, da odabere da primjeni na cijeloj teritoriji Bosne i Hercegovine, odgovarajuće propise ili dijelove tih propisa, koji su bili ranije na snazi u Federaciji BiH, Republici Srpskoj ili Brčko Distriktu.

(4) U slučaju iz stava 3. ovog člana, Upravni odbor mora izdati odgovarajuće instrukcije, Upravi i Poreznim upravama Federacije BiH, Republike Srpske i Brčko Distrikta.

Amandman 12.

U članu 51., riječi «osmog dana od dana» zamjenjuju se riječju «danom», a ostali tekst ostaje isti

Budući da je Zakon usvojen u različitom tekstu u odnosu na Predstavnički dom, Dom naroda imenovao je slijedeće delegate za članove Zajedničke komisije za nastojanje postizanja sporazuma o identičnom tekstu Zakona:

- Hasan Čengić
- Ante Spajić
- Boško Šiljegović

Ad-3. Prijedlog zakona o akcizama u Bosni Hercegovini – prvo čitanje

U raspravi su učestvovali: Ilija Filipović, Tomislav Limov, Hasan Čengić, predstavnik Vijeća ministara Ljerka Marić, Velimir Jukić, Osman Brka, sekretar Doma naroda Jadranko Tomić i Đoko Pajić.

Dom naroda većinom glasova je u oba čitanja usvojio Prijedlog zakona o akcizama u Bosni Hercegovini sa slijedećim amandmanima:

Amandman 1.

U članu 2., stav (1), iza riječi “ Službeni glasnik BiH“ dodaje se “55/04”.

Amandman 2.

U članu 3. na kraju teksta dodati značenje slijedećih izraza:

«Uprava» označava Upravu za indirektno oporezivanje BiH;

«Upravni odbor» označava Upravni odbor Uprave za indirektno oporezivanje BiH.»

Amandman 3.

U tački 2. stava (2) člana 5., brisati riječi «Uprave(u daljem tekstu: Upravni odbor)» , a riječ «osnivati» zamjeniti riječju «zasnivati».

Amandman 4.

Skraćenica «UIO» zamjenjuje se riječju «Uprava» u stavu (5) člana 23. i stavu (3) člana 24.

Amandman 5.

U članu 28. stav (2) podstav 1., tekst se mijenja i glasi:

“Propise o ugradnji mjernih instrumenata i ovlaštenjima Uprave iz člana 16.ovog zakona.”

Amandman 6.

U članu 28., iza stava (2), dodaju se stavovi (3) i (4) koji glase:

(3) U periodu dok u rokovima predviđenim u stavovima (1) i (2) ovog člana Upravni Odbor ne usvoji potpune propise za primjenu ovog zakona, a u cilju postizanja osiguranja stabilnosti javnih prihoda i najpovoljnijeg tretmana poreskih obaveznika, Upravni odbor može, u situacijama koje nisu potpuno ili prikladno riješene privremenim propisima za primjenu ovog zakona, da odabere da primjeni na cijeloj teritoriji Bosne i Hercegovine, odgovarajuće propise ili dijelove tih propisa, koji su bili ranije na snazi u Federaciji BiH, Republici Srpskoj ili Brčko Distriktu.

(4) U slučaju iz stava 3. ovog člana, Upravni odbor mora izdati odgovarajuće instrukcije, Upravi i Poreznim upravama Federacije BiH, Republike Srpske i Brčko Distrikta.

Amandman 7.

U članu 29. stav (2), broj “3” mijenja se brojem “7”, a na kraju stava se dodaje “osim ako drugačije ne odluči Upravni Odbor.”

Amandman 8.

U članu 29. stav (3), broj “3” mijenja se brojem “7”, a na kraju stava se dodaje “osim ako drugačije ne odluči Upravni Odbor.”

Amandman 9.

U članu 32. stav (2), na kraju stava dodaje se “u skladu sa članom 25. stav (2) Zakona o sistemu indirektnog oporezivanja u Bosni i Hercegovini (“Službeni glasnik BiH” 44/03 i 52/04)”

Amandman 10.

U članu 33., dio zakoni u Republici Srpskoj, tekst “Zakon o posebnim republičkim taksama (“Službeni glasnik RS” broj 8/94, 29/00, 18/01, 22/01 i 60-II dio/03= da se član 2a i 2b brišu u ovom zakonu”, mijenjaju se riječima:

“Članovi 2.a i 2b. Zakona o posebnim republičkim taksama (“Službeni glasnik RS” broj 8/94, 29/00, 18/01, 22/01 i 60-II dio/03).”

Amandman 11.

U članu 34., riječi «osmog dana od dana» zamjenjuju se riječju «danom», a riječ “najkasnije” se briše.

Budući da je Zakon usvojen u različitom tekstu u odnosu na Predstavnički dom, Dom naroda imenovao je slijedeće delegate za članove Zajedničke komisije za nastojanje postizanja sporazuma o identičnom tekstu Zakona:

- Hasan Čengić
- Ante Spajić
- Boško Šiljegović

Nakon usvajanja Prijedloga zakona o akcizama u Bosni Hercegovini sjednica je prekinuta i njen nastavak je zakazan za 18,30 sati.

Sjednica je počela sa radom u 18,30 sati.

Sjednicom je predsjedavao Goran Milojević, predsjedavajući Doma naroda Parlamentarne skupštine Bosne i Hercegovine.

Na nastavku sjednice bilo je prisutno 14 delegata.

Osim delegata na sjednici Doma naroda prisustvovali su: predstavnici Vijeća ministara, predstavnici međunarodnih organizacija, pozvani gosti i predstavnici sredstava javnog informisanja.

Na nastavku sjednice se razmatralo slijedeće:

3. Davanje saglasnosti za ratifikaciju Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju
4. Davanje saglasnosti za ratifikaciju Sporazuma o kreditiranju i garanciji između Vlade BiH, kao garanta, Vlade Federacije BiH kao subgaranta, i JKP Vodovod i kanalizacije Tuzla, kao pozajmljivača i Mađarske Eksport-Import banke LTD.

Kao i dvije dopunjene tačke dnevnog reda

5. Izvještaj Zajedničke komisije o nastojanju za postizanje sporazuma o identičnom tekstu Prijedloga zakona o porezu na promet proizvoda i usluga

6. Izvještaj Zajedničke komisije o nastojanju za postizanje sporazuma o identičnom tekstu Prijedloga zakona o akcizama u Bosni Hercegovini

Ad-4. Davanje saglasnosti za ratifikaciju Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju

U raspravi je učestvovao Hasan Čengiđ.

S obzirom da nije bilo entitetske većine, Kolegij Doma naroda je u skladu sa Poslovníkom dao saglasnost za ratifikaciju Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju.

Ad-5. Davanje saglasnosti za ratifikaciju Sporazuma o kreditiranju i garanciji između Vlade BiH, kao garanta, Vlade Federacije BiH kao subgaranta, i JKP Vodovod i kanalizacije Tuzla, kao pozajmljivača i Mađarske Eksport-Import banke LTD

U raspravi su učestvovali: Hasan Čengiđ, Vinko Radovanović i Mustafa Pamuk.

Dom naroda jednoglasno je dao saglasnost za ratifikaciju Sporazuma o kreditiranju i garanciji između Vlade BiH, kao garanta, Vlade Federacije BiH kao subgaranta, i JKP Vodovod i kanalizacije Tuzla, kao pozajmljivača i Mađarske Eksport-Import banke LTD.

Ad-6. Izvještaj Zajedničke komisije o nastojanju za postizanje sporazuma o identičnom tekstu Prijedloga zakona o porezu na promet proizvoda i usluga

U raspravi nije niko učestvovao.

Dom naroda jednoglasno je usvojio Izvještaj Zajedničke komisije o nastojanju za postizanje sporazuma o identičnom tekstu Prijedloga zakona o porezu na promet proizvoda i usluga.

Ad-7. Izvještaj Zajedničke komisije o nastojanju za postizanje sporazuma o identičnom tekstu Prijedloga zakona o akcizama u Bosni Hercegovini

U raspravi nije niko učestvovao.

Dom naroda jednoglasno je usvojio Izvještaj Zajedničke komisije o nastojanju za postizanje sporazuma o identičnom tekstu Prijedloga zakona o akcizama u Bosni Hercegovini sa slijedećim zaključcima:

1. Zahtijeva se od Vijeća ministara BiH i Upravnog odbora Uprave za indirektno oporezivanje BiH da najkasnije do 31.01.2005. godine sačine i dostave u parlamentarnu proceduru Prijedlog zakona o izmjenama i dopunama Zakona o akcizama BiH, kojima će proširiti predmet oporezivanja u skladu sa diskusijama i prijedlozima poslanika i delegata iznesenim na sjednicama komisija i domova, sa posebnim osvrtom na problematiku koju su tretirali amandmani uloženi od strane poslanika i delegata. Stenogrami sjednica komisija i domova, a i ulagani amandmani će se uputiti Vijeću ministara BiH i Upravnom odboru UIO BiH.
2. Ukoliko se ne realizira zaključak br. 1., nadležne komisije domova će zajednički uraditi Prijedlog zakona o izmjenama i dopunama Zakona o akcizama i uputiti u parlamentarnu proceduru.

Sjednica je završena u 20,10 sati.

Sastavni dio ovog zapisnika je neautorizovani transkript sjednice.

SEKRETAR
DOMA NARODA
Jadranko Tomić

PREDSJEDAVAJUĆI
DOMA NARODA
Goran Milojević